

永樂大典

卷〇三四二 陳字

卷〇三四三 陳字

卷〇三四四 陳字

卷〇三四五 陳字

永樂大典卷之三千一百四十一 九真

陳

陳安石

宋史列傳陳安石字子堅以蔭鎖廳及第嘉祐中轉運判官民畜蠱毒殺人捕誅其魁并得良藥圖由是

毒者得不死提點陝西刑獄攝帥鄜延能用謀者敲動靜輒先聞嘗救邊部戒嚴既而數萬騎奄至無所獲而去璽書嘉之歷使京西河東淮南京東知蘇州邠州河中府戶部副使韓絳鎮太原議行鹽法與監司多不合加安石集賢殿修撰為河東轉運使議始定謂其僚曰興事當有漸急則擾乃出益付民而畀之券使隨所得貿易鬻畢而歸募盜販為減進天章閣待制官軍西征時遣縣令佐督餉安石謂文吏畏怯武人邀功乃但取敢行者申約東以防衆潰曰事不豫警俟其犯而誅之是罔民也王中正帥東師而西報安石持四十日糧而師駐白草平彌月安石深念曰吾頃兵益久而秦甲未至儻不足於食將以乏軍興罪我即擅發民再餉乃以聞李舜舉劾其專詔置獄於潞安石自麟州會逮俄而他路餽糧多不繼

神宗察其無罪赦之。尚書省初建召為戶部侍郎嘗與右曹李定同奏事帝目留之曰卿豈非在淮南日不肯保李定持服者乎對曰詔問臣臣不敢不以實奏帝曰以實事君朕所與也進吏部侍郎選人將改京官須次久臨當引對率困於刑寺審問或沮以微文則一跌不復安石請罷再問以絕曩弊遂為後法出知永興軍鄧襄陳鄭州河陽至龍圖閣直學士紹聖元年卒年八十一

陳鄂

建安志陳鄂字彥聖建陽人嘉祐中擢進士第調廬州司法參軍再授歙州推官知蘇州崑山縣歲饑屬邑希部使者旨不敢蠲賦公曰歲歉而賦不蠲則流轉溝壑何以字民卒蠲之後為司農丞未嘗謁政府遷太府丞請外除閩漕元符中以元祐黨謫廢後復官朝奉大夫卒鄂性剛亮歷官五十年帑無贏貲退無居廬舊吏以郭貧饋金數百兩竟不受士大夫以是稱之

陳知和

宋晁无咎濟北集朝請大夫政仕陳君基誌銘陳氏諱知和字德時按其譜博州人也六世祖翔唐末從事成都府王建有異志翔屢沮之廢居閩州之西水孟昶以蜀歸曾祖諱省華始來自蜀為祥人仕本朝為左諫議大夫有能聲贈太師尚書令兼中書令

秦國公秦公生三子皆儒學擢高第位將相勲勞於國樞密使尚書石僕射同中書門下平章事贈太師尚書令兼中書令英國公謚文忠諱堯叟君祖也英公生尚書都官郎中贈金紫光祿大夫諱師古先祿生君先祿前夫人賈氏永年縣君後夫人潘氏安福縣君而君寧國縣太君賀氏出也先祿當任子以與其族人而君從祖太尉康肅公方觀察宿州任君石班殿直及長知書歎曰吾家世如是吾父教我以學何如而吾可用此進耶乃上書願易所得官從左選仁宗嘉其意且以其文忠後從之初調河陽節度推官事四守梁適李淑張觀蘇紳皆當顯人其趣操不必同而君介然若一四人者皆賢之再調寧國軍節度使推官竄卒謗耕民剝里中卒殺人民從旁止之傷而免守欲并論民死君爭之力守怒而入君立廡下不去守悟爲謝諸朝民果不死遭安福憂免喪擢衛尉丞知硤石縣事縣當陝衝辛苦於役作偽印帖隱民間前令比獲以要賞君一日執六人且嘗度關法應死既不忍以要賞見其廷然誠苦於役者爲移文所從來無他過取偽印帖焚之還其役戍兵道縣中群博犯法違者執于庭數百人譟縣門且奪之吏趣閉門君徐出坐堂上命開門衆莫敢入因陽叱邏者鮮鯨之既行密疏其名河南府皆正其罪改簽書彰德軍節度判官事

未行遭寧國憂免喪遷大理丞知緬氏縣事英宗即位遷石贊善大夫昭
陵采石聚兵緱氏城中萬人倉無儲粟而輸者未至君度不可缺報乃下
令借富人停粟約與之息匿者沒官令出而辦比輸者至則兵仰食縣者
十五日矣事已旁縣吏皆遷而君不自言賞亦不及遷殿中丞又遷國子
博士通判果州事神宗即位遷尚書虞部員外郎賜五品服還朝用薦監
左藏庫不就通判趙州事遷比部員外郎曾孝寬察訪河北奏君偕行朝
廷方議省郡縣寬力役吏希旨爭言可省而乾寧保定順安三軍在議中
俾君往視還言沿邊城犬牙相制以利守禦而便轉輸此祖宗深意不可
改朝廷然之為不廢三軍中人程昉建言徙漳河洛州使者以君權知洛
州董其事漳河役大昉欺朝廷以易集務減人徒以故怨之百餘人燒民
廬為暴君盡捕得誅其始謀者八人事且畢會新守至君還趙州昉以君
為暴其短乃歸力新守而君亦不辯也丞相王公安石雅知君可用使人
諭君歛故難治而朝廷方行法欲以倚君君不得辭懼知欽州事遷駕部
員外郎自以不能當執政意至則求閑局差管勾嵩山崇福官民上書願
留者以千數房州地僻守屢以賊敗又擢知房州事郡阻山城西有谿所
從來高望之洶洶在城上舊有堤圯不治餘三十年君議增築不欲調民

乃以術招竄卒廩之。蓋以州兵凡用工萬高其舊丈二尺而廣如之。人初以爲煩。會明年溪大漲得堤而定。人乃服君。奏課京西第一。遷虞部郎中。擢知泗州事。郡當水衝屬霖潦。君度准汴泗滿必大下。因預爲守城備。水至浸城且壞。吏倉卒不知所爲。而君規畫素定。語吏如此。城旣無虞而民賴以活。萬計。璽詔獎諭。擢提點廣南東路刑獄事。改朝奉大夫。番禺南粵都。會守俸月七萬。守方對詔獄。君攝州事。竟八月得錢六十萬。君不取。曰。我豈緣人。不幸而自裕邪。宴賓客爲徹樂。其忠厚如此。遷朝散大夫。盜起梅州。去治所更四郡。君以爲道驛而往。恐後乃自南雄州絕山信道。崎嶇茆竹間。蒙霧得疾。幾殆。後良愈。因求上印。被時方六十一。即去位。遷朝請大夫。賜三品服。勲上柱國。爲人清慎。迭約不干權貴。善與人交。自以無怨惡於人。明白立斷。所至民愛之。善楷隸。喜爲詩。既謝事。作燕譽堂於第之西北隅。蓋以訓詞名之。日從賓客飲酒談笑。其間以疾卒。壽六十四。元祐二年五月丁巳也。夫人鄭氏安居縣君。男曰迺。寧鄉縣尉。迺鄭州司戶適臨河主簿。女長適朝散郎潘行次。適通直郎王鎮。次適道州錄事楚冲。次適宣德郎周昕。幼在室。孫男女七人。諸孤以君卒之明年七月壬申葬於河南府密縣義臺鄉之武泰岡。來求銘。銘曰。仕可以藉其世。而公不賴。

之進可以遇合而公不競之時未可以去也而公去之事取其先得其後名處其薄功處其厚造物者報其天不報其人其人不亡在其後子孫

陳升之

宋史列傳陳升之字暘升建州建陽人舉進士歷知封州漢陽軍入爲監察御史右司諫改起居舍人知諫院時俗

好藏去交親尺牘有詔則轉相告言有司據以推詰升之謂此告訐之習也請禁止之又言三館爲搢紳華途近者用人益輕遂爲貴游進取之階請嚴其選詔自今臣僚乞子孫恩者毋得除館閣著作佐郎王瓘遇殷帥郭承裕於道訶怒不下馬執送府升之言京官不宜爲節度使下馬因劾承裕驕恣解其任張克佐緣後宮親爲三司使尋爲宣徽使內侍王守忠領兩鎮留後求升正班御史張昇補郡久不召彭思永論事令窮問所從來唐介擊宰相庠嶺南升之皆極諫遷侍御史知雜事凡任言責五年所上數十百事然持論不堅以故不盡施用擢天章閣待制河北都轉運使知瀛州其定府加龍圖閣直學士復知諫院上言天下州縣治否朝廷不能周知悉付之轉運使今選用不精又無考課非閹滯罷懦則陵肆刻薄所以疾苦愁歎墮於上聞必欲垂意元元且從此始乃詔翰林學士承旨孫抃權御史中丞張昇與升之同領磨勘轉運使及提點刑獄功務升之

初爲諫官時嘗請抑絕內降詔許有司執奏勿下至是申言之詔委三省
初正其罪仍揭於朝堂文彥博乞罷相升之應樞密使賈昌朝復用疏論
其邪昌朝卒罷去遷樞密直學士知開封府歲餘拜樞密副使於是諫官
御史唐介范師道呂誨趙抃王陶交章論升之陰結宦者欲得大用仁宗
以示升之升之丐去帝謂輔臣曰朕選用執政豈容內臣預議耶乃兩罷
之以升之爲資政殿學士知定州徙太原府治平二年復拜樞密副使神
宗立以母老請郡爲觀文殿學士知越州熙寧元年徙許中道改大名府
過闕留知樞密院故事樞密使與知院事不並置時文彥博呂公著旣爲
使帝以升之三輔政欲稍異其禮故特命之明年同制置三司條例司與
王安石共事數月拜中書門下平章事集賢殿大學士升之旣相遂請免
條例司其說以爲宰相無所不統所領職事豈可稱司安石曰古之六卿
即今之執政有司馬司徒司空各名一職何害於理升之曰若制置百司
條例則可但令制置三司一官則不可由是忤安石稱疾歸卧逾十旬帝數
數諭乃出會母喪去位終制詔爲樞密足疾不能立朝七年冬祀又不能
相禮拜鎮江軍節度使同平章事判揚州封秀國公卒年六十九贈太保
中書令謚曰成肅升之深狡多數善傳會以取富貴王安石用事惠正論

盈庭引升之自助升之心知其不可而竭力爲之用安石德之故使先已
爲相甫得志即求解條例司又時爲小異陽若不與之同者世以是譏之
謂之臺相升之初名旭避神宗嫌名改焉史論載王珪傳後東都事畧升
之爲人深沉始爲小吏與王安石相遇淮南安石深器之升之在樞府安
石亦執政多變更舊制引升之共事升之心知其非而竭力贊助之以故
先安石爲相既拜乃言制置三司條例司難以僉書臣待罪宰相無所不
統所領職事豈可稱司安石曰司者臣道也人臣固可稱升之曰令之有
司皆領一職之名非執政之所宜稱安石曰古之六卿即今之執政有司
馬司徒司空各名一職何害於理三公無官以六卿爲官周公以三公爲
冢宰蓋其他三公或爲司馬或爲司徒或爲司空古之三公猶今三師古
之六卿猶今兩府也宰相雖無所不統然亦不過如古冢宰而已冢宰掌
邦治至於邦教邦政邦禮邦刑邦事則雖冢宰亦有所分掌矣升之曰若
制置百司條例則可但令制置三司一官條例則不可神宗謂安石曰卿
獨領可乎安石請用韓絳乃聽升之免條例司以母喪去位終制拜同平
章事樞密使契丹遣蕭禧來議河東地界理屈卧都亭驛不敢歸升之曰
致養授館有常禮過期曲留宜即裁抑禧慙沮乃行以足疾求罷拜鎮江

軍節度使同平章事判揚州封秀國公請老以故官致仕卒年六十九贈太保中書令謚曰成肅初升之母竇娠至李秋爲彌月父儼善推策得九日吉而升之以是日生故名從九從日字升之至神宗立乃以字爲名云京口耆舊傳陳升之本建人國史有傳墓在縣之五州山二子閔閔皆以父任閔終宣義即無子閔終大理評事子懌以祖恩授承務郎亦早卒以從姪鎮爲嗣終宿州符離知縣三世並祔葬五州升之自建來居從子豫及禧實與俱來豫以升之廢終中奉大夫四子机桶最知名机知信州劾秦檜妻黨王仲山坐廢檜死起知楚州將漕淮南終知衢州桶爲韓世忠軍叅謀九世忠出師桶皆在行積功爲右文殿脩撰數文閣待制卒三子官皆至陞朝禧之弟出繼升之後即鎮也再傳而絕命他族人爲繼又再傳而絕今繼升之後者禧之曾孫應岍之子其元一統志陳升之本名旭自升之避國諱以字行改字賜叔博學多能第進士初嘉祐末爲諫官劾賈昌朝不可輔政頗有聲稱宋熙寧中以王安石薦拜相時同郡吳充亦拜相神宗問司馬光近相陳升之外議云何光曰今已宣麻播告臣雖言之無益耳神宗曰試言之光曰閩人狡楚人險今用三相皆閩人二參皆楚人必將援引鄉黨充塞朝廷天下風俗何必更得淳厚上曰升之有才智

先曰固然但恐不能臨大節而不可奪耳鎮江志陳丞相升之自建來從
子禧豫實與俱以升之奏補禧終負外郎管當在京儀鸞司子琳選調豫
中奉大夫四子机桶最知名机知信州楚州淮南漕知衢州桶敷文閣侍
制三子皆陞朝禧之弟繼升之後即鎮也今繼升之後者禧之元孫其詳
見耆舊傳鎮亦陞朝子者從政郎禧之孫雅言嘉言之子應岍三舉
于鄉其應岍之子也謂亦又陳升之字賜叔建安人居丹徒位至丞相封
秀國公升之本由進士及第然以其非茲郡所舉故畧而不載至其子孫
由此鄉舉而登第者則書之後皆倣此閱升之子宣義即無子闕閱
弟大理評事蚤卒禧升之從姪員外郎管當在京儀鸞司孫應岍見科
舉類豫禧弟中奉大夫鎮亦禧之弟升之命為後終宿州符離知州
憬升之孫閱子承務即蚤卒者鎮子從政郎琳禧子迪功郎机
豫子知信州楚州淮南漕知衢州桶机弟敷文閣侍制岍桶孫朝散郎
知英州岍嶧弟朝奉郎通判和州岍弟通直郎知江陰縣輿地紀
勝陳升之字賜叔建陽人博學多能景祐擢進士甲科既而在言路以直
道自任多所彈擊仁宗權樞密副使神宗即位拜相後居于潤薨葬于潤
子孫因家焉姓氏通華陳升之字賜叔登科為太學博士楊州芍藥花開

四朶太守韓琦通判王珪幕僚王安石三人宴欠一人守命吏有客即通
既而報陳太傅謁召與宴四花方有屬後四公俱拜相升之元豐年平章
事判楊州封秀國公年六十九卒謚成肅公其先建州人惟楊志王安石
送陳升之序今世所謂良大夫者有之矣皆曰是宜任大臣之事者作而
任大臣之事則上下一失望何哉人之材有小大而志有遠近也彼其任
者小而責之近則照照乎仁而有餘於仁矣子子然義而有餘於義矣人
見其仁義有餘也則曰是其任者小而責之近大任將有大此者然上下
歎之云爾然後作而任大臣之事大臣之事宜有大此者焉然則照照然
而已矣子子然而已矣故上下一失望豈惟失望哉後日誠有堪大臣之
事其名實然於上上必懲前日之所歎而逆疑焉暴於下下必懲前日
之所歎而逆疑焉上下交疑誠有堪大臣之事者而莫之或任幸欲仕則
左右小人得引前日之所歎懲之矣噫聖人謂知人難君子惡名之溢於
實爲此難則柰何亦精之而已矣惡之則柰何亦充之而已矣知難而不
精之惡之而不能充之其亦殆哉予在楊州朝之人過焉者多堪大臣之
事可信而望者陳升之而已矣今去官於宿州予不知復幾何時乃一見
之也予知升之作而任大臣之事固有時矣照照然仁而已矣子子然義

而已矣非予所以望於升之也。

陳造

宋晁景迂集故贈承議郎陳公墓誌銘承相文忠陳公長子師古尚書都官郎中知七郡有政績生子知章大理評事幼有大

才日誦萬餘言落筆數十字在頃史間嘗行役下馬道傍讀古碑二千餘言歸覆之一字不謬謝希深手書啓事上尊府廷評隨衆目在傍明恢乃携啓本去廷評取紙平空細字寫一通如初夏英公雅重其詩文數來問典故及奇字卒年二十有四娶殿中丞賈守文之女叅知政事之孫生子造字公甫其生四月而孤曾祖母邠國大夫人宋尚無恙深憐撫之仁宗待邠國以異禮出入廣內稱呼如家人既薨上震悼之乃特錄孤曾孫以太廟齋郎既冠調黔州司戶叅軍尋罷去復司戶戎州兼錄叅司法叅軍不以門地自慢遇事如老於為吏者國朝自丞相賈公樞密副使吳公慶曆八年上編勅二十卷後逮公之出仕幾二十年不復設官編勅其下邠國者雖稀簡而必具啓請申明若奏可本末寫成大軸非若其後一事一印紙日皆至雖數紙不厭也以故勅令壓架擲塵垢莫可觸壞鼠麋爛不能文字更幸以輕重出入為利況在戎州遠徵公視而笑曰乃今可為

矣。白郡守武侯曰：無斧斤則夫鑿枘，願以編初後所降依門次第之上奉朝廷之命。下絕吏爲民害，幸甚。於是未半年書成，居數年，是謂嘉祐七年。丞相韓公上編初三十卷，願之以勸公之私書。其異同者兩條，餘如同。繩墨尺寸出也。戎人楊三尊者，黠鷲自異，喜生事，漁獵其酋長，亦憚畏之。公一見嫉之，曰：豺豕也。留之，異日必貽患於人。無幾，何三尊被輕繫，公乃發其前後殺人死罪數十，立以法誅之。戎塞悅伏，以公爲神明。而我漢賴公以寧居者數十年。州將一旦率官屬登城樓，語非所宜言者，爲人告之一郡官悉就逮。公初未嘗從之樓上，乃領州事久之，益得盡其才，賈夫人感疾。公旣江下三峽，謁殿中丞單驥，其勞萬里，夫人疾愈，去爲楊州節度推官。王君玉侍即知楊州，以聲譽老成，自高，待公忘年，每與論新唐書抵牾而不吏之也。韓丞相玉汝以負外郎年甫三十餘來知州事，風稜人不敢喘息，晨坐得鹽賊付獄，日未午督按具甚急，公乃改遲之心，知其非真盜也。韓公怒取囚，由大書杖脊二十下，未幾真盜得而韓公爲公慚焉。自是韓公之威少霽，而多與公議事。有江都宰者地寒而賢，後太守朱大監以私意欲罪去之。公率郡官廷辯曰：江都宰無罪，且才之。公在楊州四年，晚權江都時散青苗錢之初也。公視可與者與之，不以殷最爲已事，卒無一

人妄請者而刑戮賴之以省。非它縣比。用三司使舉監廣利門。初罷使臣
為門官而新城門設水扉。創格令條禁甚密。所謂三司使者一時風力人
也多從公之建明。至今人賴之以不可調宿州觀察推官。未行王丞相荆
公用以便糴河北。丁賈夫人憂。免喪。雖然嘆曰。吾少舉進士而卒不得一
第。每更一官。歸當改扶。而舉將之格必虧。其尚龜僂於斯世者。吾母待養
也。今既不得終養。則吾何用祿為。乃屏居陽翟澗上。菜飯不肉者十年。日
誦佛經宴坐。間則往來嵩少窮山水之娛。且嘗得法於天衣之門人法清。
既感疾。彌年不問醫。卒年四十有六。元豐五年二月一日也。娶阮氏。自有
誌銘。子五人。長恬。海內知名士也。起處士。今為奉議郎。遇郊恩。贈公承議
郎。次繹思。近思。惟愷。四人皆早卒。女三人。婿曰文林。即吳僧張文定公諸
孫彥之。鞠待制之曾孫正彥。孫男三人。昌邦。昌諤。昌裔。女二人。長適邯鄲
李榛。一幼。公骨相甚偉。能與人交。而不忘規過。幕兩叔父及其舅氏。嫁孤
女數人。皆盡力。其才識文藝不減其父。而不自多也。恬以建中靖國元年
五月二十四日葬。公于新鄭世墓之次不及銘。後十有一年。因柑阮夫
人乃得銘於恬之友嵩山晁說之。銘曰。昭陵之時。無窮士。何夫子之傑
才。駿識早聲聞。而辱下僚。芳勅令刺於私室。而德我誅以獨見。乃未老而

澗濱慕簾與嵩山高兮。相門之初必復其難去斯世而有覺者以超超兮。有祖有父之風烈而有子以景樂則吾之幽蒙昭昭兮。

陳睦

蘇州府志陳睦字子離祖絳福州莆田人舉賢良方正官至石司諫徙家蘇州兄侗章衡榜進士知汝州富弼辟為從事召除

館閣校勘歷銜尉少卿元豐中知陝湖宣三州睦嘉祐六年進士第二治平中詔舉館閣才學之士睦與劉攽李常寧李清臣輩首被選擢拜監察御史熙寧中提舉兩浙常平以丞相魯公亮薦遷提點刑獄坐是免官元豐間高麗數遣使航海修貢朝廷以其恭順選使諭旨激以忠義初命林希希力辭之更以命睦睦即日就道上喜語輔臣曰林希無親堅辭不往睦親在乃不憚行假起居舍人直昭文館特贈仙華金帶自春銜命涉冬而還奏言本朝故事惟實文閣直學士以上職乃服金帶今領上所賜上特旨令服之仍真拜所假官職又賜金琰於令式外以示寵錫其後錢勰楊景略援例欲服金帶上弗之許尋直龍圖閣知潭州改實文閣待制知廣州子彥文字經仲建炎二年以龍圖閣待制知江州視事方十日會盜張遇犯城彥文極力固守遇乃引去明年為沿江措置使過躡法從彥文第彥武字緯叔為提舉官古今事通陳睦提點某路刑獄時某氏有妾夏沉

有浣衣井夢其嫡子墮井死妻訟以沉香稱之三易獄不合睦怒劫孫而殺沉香他日睦還京久亡所授開廟師邢生頗從仙人游盜問以將來邢拒之而語所親曰如沉香何睦病震汗累日梅執禮送吳廷提刑序

陳某

宋李直講集鉛山縣尉陳君墓銘并序君諱某字某與子同郡實建昌南城人曾祖某祖某為郡著姓父某尤善士有二子君

其仲也君幼而開爽多智慮以兄官學膝下少人廼顯治生若親之意其先子豁達而好義自放于詩酒間罕視家事而財用所出近得以贖親故遠得以及羈旅為有識所貴者繫君之力是賴既孤而母老伯氏從王事溫清益謹而田里益脩彼士千里之外而無反顧之憂者抑君使然免喪數年遊京師屬河決以財佐公上補太廟齋郎選授邵武軍建寧縣尉于時盜賊多主名不見邑居患之君以機往所至輒禽郡守言其勞不報替授茂州司戶兼錄事叅軍兄為德陽宰不且俱入蜀改信州鉛山縣尉未行以疾終年五十一嘉祐元年夏四月癸亥也娶鄧氏生男光遠光道皆好學見稱于士友君之啓手足命以卒業而已不語他事一女嫁黃某亦冠族其冬十一月壬寅葬于所居東北十有餘里太平鄉三異里符源銘